



**Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni Islandimilu Naalackersuisunut kaammattuutigaa nunani avannarlerni killerni oqaatsit siunissaat pillugu suleqatigiinnissaq anguniarlugu pisortatigut oqaloqatigiittarfimmik pilersitsisoqassasoq. Suleqatigiissitamik nunanit ataasiakkaanit aallartitanik inuttalikkamik pilersitsineq alloriarneq siulliussaaq. Nalunaarusiamik nunani ataasiakkaani oqaatsit inissisimanerannik takussutissiiffiusumik siunissamilu periarfissaat pillugu allaaserisanik imaqartumik suliaqarnissaq suleqatigiissitap suliaasarissavaa, tamanna pingaartumik qarasaasiarsornikkut ineriartorneq maanna atuuttoq tunngavigalugu.**

Aallartitat siulittaasuat Vivian Motzfeldt  
(Siullermeerneqarnera)

Nunat Avannarliit Killiit Siunnersuisoqatigiiffiata nunani avannarlerni killerni oqaatsit siunissaat pillugu suleqatigiinnissamut Naalackersuisuinut kaammattuuteqarneranut qujanaq.

Ullumikkut oqaatsitta atugaanerat nammineerlunga ernumassutigingilara, amerlasoorpassuullutami kalaallisut oqaloqatigiissinnaavugut allassinnaallutaluunniit. Aamma pingaaruteqarpoq eqqaamassallugu aammalu ataqqissallugu oqaatsit sorliit atorlugit oqalukkusunneq inuup nammineerluni aaliangigassarigaa. Oqaatsigummi atukkagut ulluinnatsinni pingaaruteqarluinnartumik toqqissisimaffigalugit inuugatta.

Unali pineqartoq, inuiaqatigiinni innuttakittuni oqaatsitta illersortuarnissaat, nukittorsartuarnissaat siunissamullu isigaluni periarfissat pillugit suleqatigiissitami sulisoqarnissaanut kaammattuuteqarneq isumaqarpunga pinngitsoorneqarsinnaanngitsoq.

Naatumik oqaatigalugu nunani avannarlerni oqaatsit siunissaat pillugu suleqatigiinnissaq anguniarlugu pisortatigut oqaloqatigiittarfimmik pilersitsisoqarnissaa tamakkiisumik taperserparput, ataatsimiitsitaliamullu susassaqartumut ingerlateqqillugu.